

# INUIT ATAQATIGIIT

## INATSISARTUNI



20. oktober, 2013

Inatsisartut suleriaasianni § 37 naapertorlugu makkuninnga Naalakkersuisunut apeqquaqateqassaanga:

(Inatsisartunut ilaasortaq Sara Olsvig, Inuit Ataqatigiit)

### Apeqqutit:

- 1) **“Uranimik pīaaneq avammullu annissuineq pillugu nalunaarusiaq”-mi atuarneqarsinnaavoq Det Internationale Atomenergiagenturip atomip nukinganik pissuteqartumik ajutoortoqartillugu imaluunniit radiologiikkut ajornartorsiortoqalersillugu ikiuunnissaq pillugu isumaqatigiissutaa”**  
**“atomimik pissuteqartumik ajutoortoqarnerani imaluunniit radiologiikkut ajornartorsiulersoqartillugu nunat tamalaat akornanni sukkasuumik ataqatigiissaarluakkamillu suleqatigiinnissaannut najoqqutassiornissaq”-mik siunertaqartoq Kalaallit Nunaannut (Savalimmiunullu) atortinneqanngitsoq. Nunarsuup ilaani atomip nukinganik pissuteqartumik Kalaallit Nunaannik sunniisumik arlaanni ajutoortoqassatillugu pisariaqartitsineq naapertorlugu Kalaallit Nunaata ikiorneqarnissaa massakut qanoq qulakkeersimaneqarpa?**
- 2) **“Det Internationale Atomenergiagenturip atomip nukinganik pissuteqartumik ajutoortoqartillugu imaluunniit radiologiikkut ajornartorsiortoqalersillugu ikiuunnissaq pillugu isumaqatigiissutaata Danmarkimut atortussanngortitaanera pillugu inatsit”-sip Kunngip peqqussusiorqarneratigut isumaqatigiissut aamma Kalaallit Nunaannut atortinneqaleqqullugu Naalakkersuisut danskit naalakkersuisuinut saaffiginnissuteqalersaarpat?**

### Tunngavilersuut

Nunarsuarmi tamani tamaani atomip nukinganik pissuteqartumik ajutoortoqartarlunilu ajunaarnersuaqartarpoq. Atomip nukinganik pissuteqartumik ajunaarnersuaqartillugu mingutsitsineq nunat killeqarfiinik naluvoq immakkullu silaannakkullu Kalaallit Nunaannut anngussinnaasarluni. Taamaammat Det Internationale Atomenergiagenturip atomip nukinganik pissuteqartumik ajutoortoqartillugu imaluunniit radiologiikkut ajornartorsiortoqalersillugu ikiuunnissaq pillugu isumaqatigiissutaata Kalaallit Nunaannut atortinneqannginnera assut isumakulunnarpoq. Taamaammat pisariaqavissuutippara tamatuma nalorninartua Naalakkersuisut qanoq iliuuseqarfiginiarneraat apeqqutigissallugu. Akissuteqaat ullut suliffiusut qulit qaangiutsinnagit Inatsisartunut annguteqquneqarpoq.